

CARTA JEE CUAHAN NUU ÑAYUU HEBREO

Jeē ní tají Yaā Dios Sēhe ya ni nacani ya jnūhun

¹ Tijni jínu te tijni modo ni cahān Yaā Dios jíin táca jíi yō nde jenahán, chi ni tají yá tēe ni canacani jnūhun ya.

² Te vijna te tiempo cuándihí yāha ní tají yá maá Séhe ya ni nacani ya jnūhun nuū yō. Te jíin Séhe ya ni sáha ya ñayīvi jíin táca gá, te ndivii jeē iyó ní chihi ya ndaha Séhe ya. ³ Te Sēhe ya yōhyo luu cújéhnú ya, nájnūhun luu cújéhnú máá yá. Te ndihí ndese cúu máá yá, suni súcuan cúu Sēhe ya. Te jíin poder jnūhun ni cahān Sēhe ya te iyó cutú ndihí-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā kujéhnú nde andiví.

Jeē kujéhnú ga Sēhe Yaā Dios vēsú tǎcǎ ndajéhé yā

⁴ Te ni ndujéhnú ndasí gá Sēhe ya vēsú tǎcǎ ndajéhé andiví, chi ni nihīn yā tahū jeē ndíso ya jniñu jéhnú ndasí gá vēsú jniñu cándiso ndajéhé. ⁵ Chi súcuan ni cahān Yaā Dios jíin Séhe ya, te nasūu jíin ndajéhé yā:

Máá ró cúu Sēhe ri,

te vijna te ni sajehnú ri rohó jéē cúu ri Tatá rō.

Te suni ni cahān yā jnūhun Séhe ya, te nasūu jnūhun ndajéhé yā:

Máá rí cúu Tátá nuū Séhe ri,

te máá i cúu Sēhe nuū rī.

⁶ Te suni ná ni tají yá Sēhe ya kujéhnú, ni quiji ini ñayīvi yáha, te ni cahān yā:

Ndihí ndajéhé rī na chíñúhún i Sēhe ri.

⁷ Te ni cahān tucu ya jnūhun ndajéhé yā:

Nájñūhun quée tachī, súcuan cájica ndajéhé rī sáha ri,

te tǎcǎ un jéē cájejniñu nuū rī, nájnūhun yáñuhūn cácuu.

⁸ Te jnūhun Sēhe ya chi sa suhva cáhán yā:
Máá ró cúu Yaā Dios, te ndacu ró jniñu nñí cáni,
te jniñu ndácu ró, máni jniñu ndaā cúu.

⁹ Cúsñ ni rō jíin jniñu váha, te jíto uhū rō jniñu néé.
Jeē yúcuán ruhū, Yaā Dios maá ró, ni sáha ri
jeē yóhyo ga cúsñ ni rō vēsú tāca gá jeē iyó andiví.

¹⁰ Te suni cáhán yā:

Máá ró cúu Jítoho, te nde xīhna ñúhún ni sáha ró jéē ni
jécōo ñayíví.

Te andiví chi suni jeē ni sáha ró cúu.

¹¹ Te tācá un chi naa, te máá ró chi nñí cáni iyó ró.

Te tācá un chi cutúhú nájñūhun cútúhú ñin sahama,

¹² te nacaquin jnahnū rō te nasama ró jíjnáhan.

Te máá ró chi ma sáma cuítī rō,
te quiví cótecu rō ma ndñhi cuítī.

¹³ Te súcuán ni cahán tucu yā jíin Séhe ya, te nasūu jíin
ndajéhé yā:

Cucōo ró lado váha ri nuū cujéhnū ró,

te na sáha ri jeē quende rō poder tāca jéē cájito uhū rohó.

Achí yá. ¹⁴ Te tācá ndajéhé yā chi mozo-ni cácuu, te tájí
yá cuangoo jeē chindéé ñáhán ñáyuu jeē nihín tahū jeē
jnama ya.

Jeē ma cúhuun ni yō jíin jnúhun jnáma ya yohó

2

¹ Núu súcuán te cánuú jéē váha ga chuhun ni yō tāca
jnūhun ya jeē ní cajini yó, chi núu tuú te sanaa te scuíta yó.

² Chi nde jenahán ní jejníñu ya ndajéhé yā ni cacastūhun
jnūhun ya, te ni cajini ñáyuu jeē iyó ndáā. Te ñáyuu nihni
ni jíin ñáyuu tu ní cájendetū jnūhun ún, vetū-ni ni canihín
i castigo. ³ Te núu súcuán ni cuu, te yóhó, ¿ndese cācu
yó núu ma chúhun ni yō jnūhun cánuú gá jeē jnáma ya
yohó? Chi xīhna gā maá Jítoho yō ni nacani ya jnūhun

yáha, te sáa te tēe jeē ní cajini nahín ni canacani ndaā tucu máa de nuū yō. ⁴ Te Yaā Dios suni ni chindée ñáhán yá de jeē ní canacani de jnūhun ya. Chi ni sáha ya jíin de jeē ní casáha de sín sín jniñu jéhnú jeē nahán náa ni yō jíto yó poder yā. Te suni ni jēhe ya Espiritu Santo yā nuū ñin ñin yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ni jēhe ya jnūhun jeē condiso jniñu siquī ñayiví jéē quíji, chi sa suhva nuū Séhe ya Cristo ni jēhe ya. Te siquī ñayiví un cúu jeē cahán rī yāhá. ⁶ Chi suhva yósó núu tútu jeē ni cáhān David jíin yá:

¿Na vé cúu ñayuu jeē ñúhun ni ní i?

Te ndíhví ni ní síquī i, te máa ñáyuu cúu i.

⁷ Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajhénu ní i te squéndōo yíñúhún ní i, te cani ní i jeē ndacu i jniñu nuū tāca jéē ni sáha ní.

⁸ Te ndíhi jeē iyó chi sáha ní jéē cujéhnú i siquī.

Achí tutu. Te jeē ni sáha Yaā Dios jeē cujéhnú i siquī ndíhi, núu súcuan te ma quéndōo ni ñin jeē ma cújéhnú i siquī. Te vēsú súcuan te vijna te ná tu coto yó jéē cujéhnú i siquī ndíhi jeē iyó. ⁹ Te jeē jiní yō vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhí yā jehē yō, te jeē yúcuan ní ndujéhnú luu tucu ya, te ndíhi cáhīyo yíñúhún núu yā. Chi jeē váha ni Yaā Dios jíin yó, jeē yúcuan ní jíhí Jesús jehē yō.

¹⁰ Te ndíhi jeē iyó chi cuenta Yaā Dios cúu, chi máa yá ni sáha. Te suni ndéca ya cuehē ndasí séhe ya jeē quihín i andiví núu luu cujéhnú i jíin yá. Te váha níhín jniñu jeē ni jēhe ya jnūndóho nuū Jesús, chi jeē ní ndoho ya súcuan te cuu condeca váha ya ñayuu ní jnama ya. ¹¹ Chi Jesús jeē ni sándoo ya i te máa i jeē ní candundoo i, chi ñin-ni

Tátá i jíin yá. Te jeē yúcuan tu cúcanu Jesús jeē cahán yā hermano yā jíin i, vēsú ndasí núu i. ¹² Chi yósó núu tútu jeē ni cáhān yā jíin Tátá yā:

Cachi na jnúhun ní núū tācá hermano na,
te mēhñu núū cándutútú i cata ná ndese cújéhnu ní.

¹³ Te suni cáhān yā nájñuhun cácahān hermano yā:

Ruhū chi cándíje ri yā.

Te cáhān tucu yā:

Yāha íne ri jíin táca gá sēhe Yaā Dios jeē ni jéhe ya nuū rī.
Achí Jesús.

¹⁴ Te nájñuhun cácacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snāā yā poder jexeén jeē squívi ñayuu nuū cuéchi te jíhí i. ¹⁵ Te ni cacu ya súcuan návāha cuu quenehen ya tāca ñáyuu chíji jnúhun jeē yuhú i cuu i. Chi ní vida i ndóho i sáha ún. ¹⁶ Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cácaandíje jeē ní nduu yucūn Abraham. ¹⁷ Jeē yúcuan ní jini ñúhún nduu inuú yá jíin táca hermano yā, návāha cuu ya sutū cujéhnu jeē squícu vāha ya tācá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā máá yá jehē i. ¹⁸ Chi suni máá yá ni ndoho ya jeē ní jito ndee jnūndóho ya, te jeē yúcuan cuu chindéé ñáhán yá ñayuu jeē jító ndee jnūndóho i.

Cújéhnu ga Jesús vēsú Moisés

3

¹ Hermano, ni cana Yaā Dios rohó, te cácuu ró ñáyuu ndoo máá yá. Núu súcuan te na nácani vāha ni rō síquī Cristo Jesús, Yaā cúu apóstol jeē ní tejníñu Yaā Dios, te suni cúu ya sutū cujéhnu síquī jnúhun cácaandíje yó. ² Chi ni squícu vāha ya nuū Yaā Dios, Yaā ní tee jniñu un síquī yā, nájñuhun ni squícu vāha Moisés nuū ñáyuu jeē ni

cáhān Yaā Dios jeē cácuu i ñayuu vehe ya. ³ Chi cújéhnū ndasí gá Jesús vēsú Moisés, nájñūhun cújéhnū ndasí gá tēe sáha vehe nasūu máá vehe. ⁴ Chi tācá vehe íyó tée ni sáha. Te máá Yaā Dios cúu jeē ni sáha tāca jéē iyó. ⁵ Te Moisés ni squícu vāha de jíín jniñu jeē ní cuu de mozo ni condito de ñayuu vehe Yaā Dios. Te ni castūhún de siquī tāca jñūhun jeē steén yā tiempo quiji. ⁶ Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ni jéjñūhun ya nuū i. Te suni máá yó cácuu ñayuu vehe ya, te núu na cuíñi nīhin yó jíín jñūhun cándije yó ndé quivī sándīhí, te núu cúsi ni yō jeē ñūhun ni yō tāca jéē váha jeē coo.

Jñūhun jeē ndetātu ñáyuu Yaā Dios

⁷ Núu súcuan te na chūhun ni yō jeē cahán Espíritu Santo nuū tútu iī:

Vijna te núu cuni sōho ró jéē cahán Yaā Dios,

⁸ te ma cúniñni ni rō nájñūhun ni cacuniñni ni ñayuu jenahán.

Chi tu ní cájendetū i nuū yā ná ni cajica i nuū ñūhun téhé.

⁹ Chi yūcuan ní casáha jíí rō jniñu jeē ni quitī ni rī, achí yá, vēsú ni cajito i tācá jniñu ni sáha ri uū xico cuiyā.

¹⁰ Jeē yúcuán ní quitī ni rī jíín ñáyuu tiempo un.

Te ni cahán rī jeē máni jeē castóo i ichi ndaā, chi tu cácuu i condiquīn i jñūhun ri.

¹¹ Te jeē yúcuán ní quitī ni rī, te ni cahán teyí rí jeē ma quívicoo cuiti i nuū ndetátú i sáha ri.

Achí yá.

¹² Núu súcuan hermano, coto má conéé ánuá ni ññ ró jéē cáca yátá ró jeē tuá cándije ró Yaā Dios, Yaā técu. ¹³ Chi sa suhva tāca quivī na stíhví jnáhan ni rō, níni gá iyó tiempo, návāha ma cúniñni ni ni ññ ró te stáhú róhó sáha ró cuéchi. ¹⁴ Te núu na cuíñi nīhin yó ndé quivī sándīhi jíín

jnúhun jeē ní quejéé yó jíín, yūcuán na te cuu yó jnáhan Cristo.

¹⁵ Chi cáhán tutu:

Vijna te núu cuni sōhó ró jéē cahán Yaā Dios,
te ma cúnihni ni rō nájñūhun ni cunihni ni ñayuu jena-
nahán.

Achí. ¹⁶ ¿Te ndé-ni cúu ñayuu jeē ní jini jñūhun ya te ni cunihni ni? Suu ndihi ñayuu jeē ni scácu Moisés jeē ní quendacoo Egipto. ¹⁷ ¿Te ndé-ni cúu ñayuu jeē ni quítī ni yā nuū uū xico cuiyā? Suu ñayuu jeē ní casáha cuēchi, te ni cajihī i nuū ñúhun téhé. ¹⁸ ¿Te ndé-ni i cúu jeē ni cáhān teyí yá jeē ma quívicoo cuiṭi i nuū ndetātú i sáha ya? Suu máá ñayuu jeē tu ní cájendetū nuū yā. ¹⁹ Núu súcuan te jíni yō jeē tu ní cúu quívicoo i nuū ndetātú i, siquī jeē tu ní cá candíje i ya.

4

¹ Te níni íyó gá jñūhun jeē ni jéjñūhun ya jeē quívicoo ñayuu nuū ndetātú i sáha ya, te na cónso iyo yó jéē ma stívi yó, návāha tú coo jíín sava ró jéē ma nihín rō quívi ró. ² Chi suni máá yó ni cajini sōho yó jnúhun jeē jnáma ya yohó, nájñūhun ñayuu jenañān un. Te nuū maá i tu ní jéjníñu jñūhun ni cajini i ún, siquī jeē tu ní cá candíje i. ³ Te yóhó jéē cá candíje, máá yó cúu jeē quívicoo yó núu ndetātu yó. Te siquī ñayuu tu cá candíje ni cahān yā suhva: Jeē yúcuan ní quítī ni rī, te ni cahān teyí rí jeē ma quívicoo cuiṭi i nuū ndetātú i sáha ri.

Te súcuan ni cahān yā vēsú je íyó túhva nuū ndetātú i nde ná ni jecōo ñayívi. ⁴ Chi súcuan yósó jnúhun nuū tútu i siquī quívi uxá:

Ni sínu Yaā Dios tāca jéē ni sáha ya, te ni ndetātu yá quívi uxá.

⁵ Te suni nuū tútu un yósó tucu:

Ma quívicoo cuiṭi i nuū ndetātú i sáha ri.

Achí yá. ⁶ Núu súcuan te sava ñayuu chi quívicoo nahín i nuū ndetátú i. Te ñayuu jenahán jeē ní cajini jnūhun jeē jnáma ya i, tu ní quívicoo i siquī jeē tu ní cájendetū i nuū yā. ⁷ Jeē yúcuan ní jeni tucu ya inga quivī jeē quívicoo ñayuu, te quivī un cúu vijna. Chi ná ni yāha cuehē tiempo jeē ni cáhān yā jíin ñáyuu jenahán, te yósó núu tútu jeē ni sáha ya jeē suni ni cahān David suhva:

Vijna te núu cuni sōho ró jéē cahán yā,
te ma cúnihni ni rō núu súcuan.

Achí tutu. ⁸ Te nde jenahán ní squívi Josué ñayuu Israel un ñuu nuū ndetátú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jíin táca ñáyuu jeē vijna cúu quivī jeē quívicoo i nuū ndetátú i. ⁹ Núu súcuan te íyó túhva nahín ñin nuū ndetātu ñáyuu Yaā Dios, nájñūhun ni ndetātu máá yá. ¹⁰ Chi ñayuu jeē quívicoo nuū ndetátú i jíin yá, chi ndetátú i jeē ní casájniñu i, nájñūhun ni ndetátú Yaā Dios nuū jniñu ni sáha máá yá. ¹¹ Núu súcuan te na ndúcú ndéyí yó quivī yó núu ndetātu yó un, te ma sáha ni ñin yó cuéchi jeē ma cándije yó, nájñūhun ni casáha i nde saá.

¹² Chi jnūhun Yaā Dios ndíto técu te íyó poder. Chi cúu nájñūhun ñin espada jeē xeén ndíndúú lado, chi nástúu cájí ndese íyó jéē níjnūní yō jíin ánuá yō, nájñūhun sáha espada jeē jéhnde te nástúu nuū ñujnáhan yiqui jíin meque. Te jnūhun ya nástúu ndíhi ndese jéni ni yō jíin ndese cúní yō sáha yó. ¹³ Te tu íyó ni ñin jeē yísáhi jeē tu jíiní máá Yaā jeē náquihin cuenta, chi ndíhi-ni jíiní vāha ya, te ndíhi-ni túu ndijin nuū yā.

Jesús cúu sutū cujéhnu ga

¹⁴ Te cánevāha yó ñin sutū cujéhnu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuñi ñihin yó jíin jnūhun jeē ní candije yó. ¹⁵ Chi névāha yó ñin sutū cujéhnu jeē jíto ndáhú yóhó

jeē tu fuerza yō squícu vāha yó. Chi nájñūhun ndóho yó jéē jíto ndee jexeén yohó, suni súcuan ni ndoho ya jeē ní jito ndee un yá, vēsú tú cuítì cuēchi ya. ¹⁶ Núu súcuan te ma yūhu yó, chi na quívi yó yuhu mesa yā, cúu jeē cacān tahu yō. Chi manī yā jíin yó, te cúndáhú ni yā yohó, te siquī jeē váha ni yā te chindéé ñáhán yá yohó táca jínu jeē jíni ñúhún yó.

5

¹ Chi tāca sūtū jeē ní kujéñnu jenahán, ni nacāji Yaā Dios de mēhñu ñáyuu, te ni jeni ya de jeē cuññi de nuū yā jehē ñayuu, te socō de ndajñíñu jíin quítì nuū yā jeē siquí cuēchi i. ² Te cuu cahān vitá de jíin ñáyuu tu jécūhun ni jíin ñáyuu castívi, chi máá de suni tú na fuerza ini de squícu vāha de. ³ Jeē yúcuan cúu jeē suni cánuú sócō de quítì nuū yā jeē siquí cuēchi máá de, nasūu máá-ni jeē siquí cuēchi ñayuu.

⁴ Te ni ñin tēe tu cúu sájéñnu de máá de jeē cuu de sutū kujéñnu, chi sa máá Yaā Dios cúu jeē nacāji ya de, nájñūhun ni nacāji ya Aarón nde jenahán. ⁵ Te suni súcuan Cristo, tu ní sájéñnu ya maá yá jeē cuu ya sutū kujéñnu, chi sa Yaā Dios ni sáha, chi ni cahān yā jñūhun yáha:

Máá ró cúu Sēhe ri,
te vijna te ni sajéñnu ri rohó jéē cúu ri Tatá rō.

⁶ Te suni cáhán tucu ya nuū tútu iī:

Ñíí cáni cúu ró sūtū,
nájñūhun sutū Melquisedec jenahán.

⁷ Te Cristo, ná ni condee ya ñayíví, te ni jicān tahu yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios, Yaā jeē cúu jnama ya jeē ma cúu yā nuú. Te siquī jeē yíñúhún ní chíñúhún yá Yaā Dios, te ni chindéé ñájñáhan Yaā Dios jíin yá nuū jñūndóho ún. ⁸ Chi

vēsú Sēhe Yaā Dios cúu ya, te ni jendetū yā ni ndoho ya ini ñayāví, te súcuan ni jini yā ndese cúu jnūhun jéndetū. ⁹ Te ná ni cuu ni squícu ndīhi ya jeē ní jendetū yā, te ni cucutú jnúhun jeē jnáma ya tāca ñáyuu jéndetū nuū yā, te cotecu i nńí cáni. ¹⁰ Chi ni jeni Yaā Dios yā jeē cúu ya sutū kujéhnū nájñūhun sutū Melquisedec.

Siquī jeē ma cáca yátá i

¹¹ Te íyó cuéhē jnūhun jeē castūhun rí siquī tāca jéē yáha. Te yí cúu jeē jécūhun ni rō sáha ri, siquī jeē tu cácu ni rō chuhun ni rō. ¹² Te je ni cunahán cácanđije ró, te jini ñúhún jéē cúu ró tée stéén nuú. Te tuú chi sa cájini ñúhún tucu máá ró tēe stéén nuū rō tāca jnúhun Yaā Dios jeē tú yí cuiti. Chi sa ni canduu ró nájñūhun sūchi yíquín jéē jini ñúhún caxin i, chi ná tu ije i caji i jeē ndáva. Súcuan cácu ró chi ná tu ije ró jíin jnúhun yí gá. ¹³ Chi núu máni máá nájñūhun sūchi yíquín jéxin cácu ró, núu súcuan te tu cúu jecūhun vāha ni rō jnūhun ndaā. ¹⁴ Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē vāha jíin jéē neé.

6

¹ Núu súcuan te na yáha yó núu tāca jnúhun Cristo jeē tú-ni yí, te na quíhín yō nuū jnúhun yí gá, návāha na íje vāha ni yō jíin jnúhun ya. Te ma ndejéé tucu yó jíin jnúhun jeē ni scuáha yó xíhna gā, suu jnūhun jeē nácani ni yō stóo yo cuéchi yó jéē cúu yō sáha, jíin jéē candije yó Yaā Dios, ² jíin siquī jeē jéndute, jíin siquī jeē soó ndaha xinī ñáyuu, jíin siquī jeē nátecu ndīyi, jíin siquī jeē jnahnú ndetū ñayuu nńí cáni. ³ Núu súcuan te na yáha yó núu tāca jéē yáha te quívi yó núu jnúhun yí gá, te núu cuāha Yaā Dios jnūhun.

⁴ Chi íyó ñáyuu jeē jé ni jecūhun ni i, te je ni jini i tāca jéē jéhe Yaā Dios, te je ni quívi i nuū jnúhun stéén Espíritu

Santo, ⁵ te suni je ni jini i jnūhun vāha Yaā Dios jíin ndese coo poder yā tiempo quiji. ⁶ Te ñayuu un núu caca yátá i, te ma cúu ga ndejéé jeé i jeé nácani ni i. Chi jeé cáca yátá i cúu nájnūhun jeé nácahni tucu i Sēhe Yaā Dios jicā cruz, te cájēhe i jnūhun canu yā cájito ñayuu. ⁷ Te ñayuu chi cácuu i nájnūhun ñuhun jeé cúun vāha saū nuū te ndóyo vāha. Te núu cánecoo jeé vāha caji tēe cásájniñu, yūcuán na te cúsiñi ni Yaā Dios jíin. ⁸ Te núu máni iñu yóquin jíin yucū sajnéñu cánecoo nuū, núu súcuan te tu jéjníñu cuiti, te squéndōo iñi yā, te iñi quivī te cayū. Súcuan jnahnū ndetū ñayuu cájica yátá.

Jeé ñuhun ni yō tāca jéé vāha jeé coo

⁹ Te máá ró jijnáhan ró hermano, vēsú cácahān rī súcuan jíin ró, te cácuahnu ni rī jeé cácuu ró ñayuu cuiñi nihin, chi ñayuu ni jnama ya cácuu ró. ¹⁰ Te Yaā ndaā cúu Yaā Dios, te tu náā ni yā jniñu cásáha ró. Chi siquī jeé cáhiyo manī rō jíin yá te ni cacundáhú ni rō hermano rō cácañdije, te ni cachindéé ñáhán ró i, te súcuan cásáha ró ndé vijna. ¹¹ Te cácuu rī jeé niní súcuan sáha ga ná iñi ná iñi ró ndé quivī sándihí, chi jeé sáha ró súcuan te nihin rō ndihí jeé cáñuhun ni rō. ¹² Te cácuu rī jeé ma cúhuun ni rō, chi sa ndacu ró ñayuu cácañdije jeé jíin paciencia cándetu i, te jeé yúcuan nihin tahu i tāca jéé ni jéjñuhun ya.

¹³ Chi quivī jeé ni jéjñuhun Yaā Dios nuū Abraham, te ni ndacunehen ya maá yá jeé ni jéjñuhun téyí yá, chi tuá na inga ndacunehen ya jeé cujéñu ga vēsú maá yá jeé cuu testigo yā. ¹⁴ Te ni cahān yā: Jendaá ndije jeé vāha ndasí sáha ri jíin ró, te sáha ri jeé nducuehē ndasí yúcūn rō, achí yá jíin Abraham. ¹⁵ Te jíin paciencia ni condetu de, te súcuan te ni nihin de jeé ní jejñuhun ya. ¹⁶ Te núu cáhán téyí ñayuu, te ndacunehen i síhvī iñi jeé cujéñu ga vēsú maá i. Te núu íyó iñi jnūhun jeé tu cácañdije jnāhan,

te núu ìn tēe cáhán teyí de jíín síhví Yaā Dios, yūcuán na te jécuiñī jeē cátejnahán. ¹⁷ Te suni súcuan Yaā Dios, chi ni jejnūhun téyí yá nuū ñáyuu jeē cuāha ya tahū i. Chi ni cuni yā jeē cucáhnu vāha ni i jeē ma nácani yátá ni yā siquī jeē ni jéjnūhun ya nuū i. ¹⁸ Chi ma nácani yátá cuiti ni yā siquī jnúhun jeē ni cáhān yā uū jíinu, ìn jeē ni jéjnūhun ya, te ìnga jeē ni cáhān teyí tucu ya siquī suni jnūhun ún. Chi tu stáhú cuiti yā. Te jeē yúcuan máá yó jeē ní tūhva yó yá, chi yōhyo íyó ndeyí ni yō, te cáñuhun teyí ni yō jeē squícu ya jeē ni cáhān yā. ¹⁹ Te siquī jeē súcuan ñúhun ni yō, te suu sáha jeē quéndōo ñihin ánuá yō jíín jnúhun ya, te quéndōo ndaā ni yō, nájñūhun quéndōo ñihin barco jeē jñí gancho yuū. Te sáha jeē cúu quīvī yó andiví núu íí gā, nájñūhun cuarto íí gā jeē ni íyo ichi yátá sahma ni ndita caa ini vehe íí jenahán. ²⁰ Te ini yūcuán chi xihna gā Jesús ni quīvī, návāha nune ya ichi quīvīcoo yó. Te jeē yúcuan ñí cání cúu ya sutū kujéhnu nájñūhun sutū Melquisedec.

Jeē cúu Jesús sutū nájñūhun Melquisedec

7

¹ Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā kujéhnu téyí. Te ni jejnahan de Abraham ná ni nandicó Abraham jeē ní cundeyí de ni cajejnahan de jíín táca rey. Te ni jicān tahu de jehē Abraham. ² Te tāca úxī ndajñíñu jeē ní quende Abraham nuū tāca rey un, ni jēhe de ìn ìn siquī un núu Melquisedec. Te síhví Melquisedec cuní cahān: rey jeē sáha jniñu ndaā. Te suni nání de rey Salem, te jnūhun Salem cuní cahān: jeē iyó ndeyí sñ ni. Te jeē yúcuan suni nání de: rey jeē sáha jeē iyó ndeyí sñ ni ñayuu. ³ Te tu cáhán tutu jnūhun tátá de ni náná de ni tāca jíí de. Ni tu cáhán núu ni cacu de, ni núu ni jihī de. Chi cúu de nájñūhun Jesús, Sēhe Yaā Dios, chi ñí cání cúu de sutū.

⁴ Te condēhe jíjnáhan ró náa jéhnú ni cuu Melquisedec, chi jíi jéhnú yó Abraham ni jēhe de ññ siquī tāca jēē uxí nuū de siquī tāca jēē ní quende de nuū rey un. ⁵ Te jíni yō jeē tāca úxí ndajníñu ni canihín ñayuu, ni cajēhe i ññ siquī un ní caquihin tēe cácuu sutū yucūn Leví, nájnūhun cáhán ley Moisés. Te ni caquihin de nuū ñayuu cácuu jnáhan de, chi ññ-ni yucūn Abraham cácuu de jíni i. ⁶ Te Melquisedec nasūu yucūn Leví cúu de, te vēsú súcuan te ni quihin de ññ siquī tāca jēē uxí nuū Abraham. Te suni ni jicān tahu de jehē Abraham, vēsú cúu Abraham tēe jeē ni jéjnūhun ya nuū. ⁷ Te jíni vāha yó jēē tēe cújéhnú ga cúu jeē jicān tahu jehē tēe núu ga. ⁸ Te ñayīvi yáha chi tāca sūtū cáquihin de ññ siquī tāca jēē uxí nuū ñayuu, vēsú cácuu te tēe cájihī. Te Melquisedec suni ni quihin de, te máá de chi cáhán tutu īi jeē técu de. ⁹ Te suni cuu cahān yō jeē Leví, tēe jeē ní quihin ññ siquī tāca jēē uxí nuū ñayuu, suni nájnūhun nuū maá de ni quihin Melquisedec ññ siquī tāca jēē uxí. Chi jeē ni jēhe Abraham nuū Melquisedec, suu cúu nájnūhun jeē suni ni jēhe de jeē siquí Leví jíni ndihi ga yucūn de jeē quíji. ¹⁰ Chi yucūn Abraham cúu Leví, te vēsú ná tu cacu de quivī jeē ni jéjnahan Melquisedec Abraham, te nájnūhun jeē ni jēhe máá de cúu jeē ni jēhe Abraham.

¹¹ Te yucūn Leví ni cane sutū Aarón jíni táca gá sutū ní quijicoo. Te ni castéén de ley yā nuū ñayuu Israel jenahán. Te núu ní cúu sáha de jeē quendōo ndaā ñayuu jíni ley un núu, te tuá cánúu jeē núcuññ inga clase sutū lugar Aarón jíni yucūn de. Te inga clase sutū cúu Cristo jeē cúu ya nájnūhun sutū Melquisedec. ¹² Te núu nucuññ inga clase sutū, te suni cánúu sáma ley siquī yucūn de. ¹³ Núu súcuan te ni sáma ley un, chi cáhán tutu īi jeē Jítóho yō Jesús cúu inga clase sutū ún, te ni cacu ya chíji inga yucūn. Te yucūn ní quiji ya ún, tú ni ññ ní cúu sutū. ¹⁴ Chi jíni vāha yó jēē

chíji yucūn Judá ni cacu Jítoho yō. Te yucūn ún chi tu ní cáhán cuiṭi Moisés jeē cánecoo sutū.

¹⁵ Te cájí cúu jeē ní nucuiñī Cristo jeē cúu ya inga clase sutū nájnūhun sutū Melquisedec. ¹⁶ Te tu cúu ya sutū jeē ní cacu chíji yucūn Leví nájnūhun cáhán ley jenahán. Chi cúu ya sutū siquī jeē ndíso ya poder cotecu yā ní cáni te ma cúu cuiṭi yā. ¹⁷ Chi súcuan ni cahān Yaā Dios jnūhun ya:

Níí cáni cúu ró sūtū,
nájnūhun sutū Melquisedec.

¹⁸ Núu súcuan te jniñu jeē ní ndacu ley jenahán siquī sutū, chi ni naa vijna, chi tu ní níhín jniñu quendōo níí cáni.

¹⁹ Chi ley Moisés tu ní sáha jeē quendōo ndaā ñayuu. Te ni nihīn yō ñin jnūhun vāha ga jeē ñúhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

²⁰ Te jíin jeē ni cáhán teyí Yaā Dios te cúu Jesús sutū.

²¹ Chi tāca gá tēe ún, nasūu jíin jnūhun jeē ni cáhán teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu:

Ni cahān teyí máá Jítoho yō Yaā Dios, te ma nácani yátá ni yā:

Níí cáni cúu ró sūtū,
nájnūhun sutū Melquisedec.

Achí yá. ²² Núu súcuan te jíin Jesús ni cucutú ñin contrato vāha ga vēsú ley jenahán. ²³ Te tāca gá sutū ún, chi ni iyo cuehē de, chi siquī jeē cájihī de te tu ní cúu cuiñi de níí cáni. ²⁴ Te Jesús chi cúu ya sutū jeē cuiñi níí cáni, chi técu yā níí cáni. ²⁵ Jeē yúcuan ndíso jniñu ya jnama ya ñayuu quíjicoo nuū Yaā Dios, cotecu i níí cáni. Chi níí cáni técu yā te cáhán yā jehē i jíin Yaā Dios.

²⁶ Núu súcuan te vāha ndasí sutū cujéhnu cúu Jesús, jeē nájnūhun jíni ñúhún yó. Chi sutū ií cúu ya, te tú na cuēchi ya, te íyó ndoo ya, te tu cúu ya jnáhan ñayuu casáha

cuēchi, te cújéhnu téyí yá nde nuū sucún gá andiví. ²⁷ Te máá yá tu jini ñúhún sáha ya nájnūhun ni casáha sutū cácujuhnu jenahán, jeē ndiquiví ni casocō de quití siquī cuēchi máá de xihna gā, te sáá te siquī cuēchi ñayuu. Chi ñin jínu-ni ni socō yā maá yá jehē yō, te ni cuu-ni. ²⁸ Chi ni jeni ley Moisés tāca sūtū cujéhnu jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jíin jéé ni cáhān teyí yá, te ni jeni ya Sēhe ya jeē cúu ya sutū cujéhnu, te sutū ndaā sutū vāha cúu ya ñí cáni.

Jeē ndíso jniñu Cristo siquī ñin contrato jeé

8

¹ Núu súcuan te jnūhun cánuú gá jeé jé ni cahān rī cúu yāhá: Névāha yó ñin sutū cujéhnu nájnūhun ni cahān rī, te ndéé yá lado váha mesa nuū ndácu jniñu máá Yaā cujéhnu nde andiví. ² Te vijna te cúu ya sutū nde andiví, jeé cúu ndije lugar iī jeē ni sáha máá Jítóho yō Yaā Dios, nasūu ñayuu. Chi tu cáa nájnūhun vehe iī jenahán jeé ní casáha ñayuu. ³ Te tāca sūtū cujéhnu ni jeconaā de jeē socó de ndajniñu jíin quití nuū Yaā Dios. Núu súcuan te Jesucristo suni ni jini ñúhún jeē socó yā jeé cúu ya sutū. ⁴ Te núu ní íyo ga yā ini ñayiví, te ni ma quijnáhan jeé cúu ya sutū jíin táca gá sutū, chi níni cásocō gā de quití nájnūhun cáhān ley Moisés. ⁵ Te jniñu cásáha de, tu quijnáhan jíin jéé iyó andiví. Chi cúu ñin muestra-ni jeē steén siquī andiví. Te cúu nájnūhun jeē ni cáhān Yaā Dios jíin Moisés quiví ní quejéé de sáha de vehe iī jenahán: Coto vāha ró jéé sáha ró táca ndajniñu nájnūhun jito jeē ni stéén rī nuū rō nde xiní yúcu, áchí Yaā Dios jíin de. ⁶ Te vijna te sáha Cristo jniñu jéhnu ndasí gá vēsú jeé casáha tāca sūtū ún, chi ndíso jniñu ya siquī contrato jeé jéé yóhyo vāha ga, chi ndíso jnūhun jéhnu ga jeē ni jéjnūhun Yaā Dios.

⁷ Chi contrato ley xihna ñúhún, núu jeē ni sáha jeē quée vāha jniñu núu, te tuá cánuú jéē cóo contrato uū. ⁸ Chi ñayuu jenahán un jéē tu ní cáquendōo ndaā, suhva ni cahān Yaā Dios jíin i, áchí tutu:

Quiji quivī jeē nasáha ri ñin contrato jeé jíin ñáyuu Israel jíin ñáyuu Judá, áchí Jítóho yō Yaā Dios.

⁹ Te ma cóo nájnūhun contrato jeē ni sáha ri jíin jíi i jenahán,

quivī jeē ní jniñi ri ndaha de jínáhan de,

te ni quenehen ri de ini nación Egipto.

Chi tu ní cásquícu vāha de jíin contrato ley rī.

Jeē yúcuan tuá ni táñúhún rí de, áchí Yaā Dios.

¹⁰ Núu súcuan te suhva coo contrato jeē nasáha ri jíin ñáyuu Israel,

nde na quiji quivī yúcuan, áchí Jítóho yō Yaā Dios:

Sáha ri jeē jécūhun ley rī nuū jeē níjnūnī i,

te suni ini anuá i tee ri jnūhun ley rī.

Te cuu ri Yaā Dios maá i,

te máá i cuu ñayuu maá rí.

¹¹ Te tuá jíni ñúhún stéén i nuū jnáhan i nuū ñáni i,

návāha cuni i ndese Yaā cúu Jítóho i.

Chi ndíhi i cuni ndese Yaā cúu ri,

nde ñayuu núu ga jíin ndé ñayuu cujéhnu ga.

¹² Chi cone cáhnu ni rī nuū i jeē ní casáha i jniñu néé,

te ni ma núcūhun ga ni rī cuēchi ni casáha i.

Achí Yaā Dios. ¹³ Te jeē ni cáhān yā jeē cuáha ya ñin contrato jeé cúu jeē ní cachi yā jeē tuá cuajniñu contrato xihna ñúhún. Te ñin jeē ní cutúhú jéē tuá jejniñu, chi jíni yō jeē je yajni naa.

Vehe iñ ñayīvi yáha ní steén ndese cáa andiví

9

¹ Te ndaā chi contrato xīhna ñúhún ní ndacu jniñu ndese chiñúhún i ya, jíin ndese coo ñin vehe iī ini ñayiví yáha. ² Te ni cuvāha vehe iī ún, te ni iyo uū cuarto. Te cuarto xīhna ñúhún jeē naní cuarto iī, ni iin candelero oro jíin mesa oro jíin pan iī. ³ Te ni iyo sahma jeē ndíta caa jeē ndihyú inga cuarto jeē naní cuarto iī ndasí gá. ⁴ Te ini un ní iyo ñin altar oro nuū cayú sūje cútú, jíin yéjnū jeē ñúhun contrato ley, te máni oro cúu nń síquī yejnú. Te ini yejnū un íne ñin tijehēn oro jeē ñúhun maná jeē ní cuun andiví. Te suni íne vara Aarón jeē ní nane numa, jíin tabla yuū jeē yosó jnúhun contrato ley. ⁵ Te síquī yejnú un ní cahīn ndindúú figura ndajéhé querubín jeē steén jeē íne Yaā Dios. Te ni sáha cuandahū síquī tapa yejnū nuū ni cóso yuyú níñī jeē ndáhva cuēchi. Te tu núne yó cáhān gā yō síquī tāca yúcuan vijna.

⁶ Te ná ni jíinu tācá un, te núu-ni núu-ni quívicoo sutū ini cuarto xīhna ñúhún jeē casáha de jniñu jeē cúu de sutū. ⁷ Te ini cuarto uū, chi tu cúu quívicoo na-ni sutū jíin inga ñayuu, chi máñúhún-ni sutū kujéhnu ga cúu jeē quívi, te suni ñin-ni vuelta jeē cuiyá. Te suni ma cúu quívi de núu tú níñī quití jeē socó de nuū Yaā Dios jeē síquī cuéchi máá de jíin síquī cuéchi ñayuu. ⁸ Te jíin yúcuan stéén Espíritu Santo nuū yō jeē ná ni iyo ga cuarto iī xīhna ñúhún ini ñayiví, te tu ní núne ichi jeē quívi ñayuu ini lugar iī ndasí jeē cúu andiví. ⁹ Chi tāca yúcuan cúu jeē ni stéén ndese cúu tiempo vijna. Chi jeē ní casocō i ndajniñu jíin quití nuū Yaā Dios, chi tu ní cúu cuíti sáha jeē quéndōo ndoo ánuá ñayuu ní casocō ún. ¹⁰ Chi tācá un ní steén máni síquī yíqui cúñu yō, ndese caji yō, ndese coho yó, ndese ndundoo yó. Te ni jejníñu máá-ni nde ni quiji Cristo jíin ñin modo vāha ga.

¹¹ Chi vijna je ni quiji Cristo, te cúu ya sutū kujéhnu ga

jeē ndíso jníñu ya siquī tāca jéē váha jeē ní quiiji vijna. Te cúu ya sutū ini lugar iī nde andiví jéē cujéhu ga te vāha ga vēsú cuarto iī jenahán. Te nasūu jéē ní casáha ñayuu cúu, chi nasūu cuenta ñayīvi yáha cúu. ¹² Te jeē ni quívi ya ini lugar iī ndasí gá nde andiví, te nasūu jíin níñī ndixúhú ni níñī becerro, chi jíin níñī maá yá ni quīvi ya, ni socō yā iin jínu-ni jeē ní cání. Te súcuan ni jnama ya yohó jéē cótecu yō ní cání. ¹³ Chi nde jenahán te níñī stíquī jíin níñī ndixúhú jíin yāā becerro jeē ni cáyū nuū altar, ni cacosō yuyú de siquī ñayuu jeē tu íyó ndoo ánuá i, te súcuan ni ndundoo i nuū yā. ¹⁴ Te núu ni nihīn jníñu níñī tācá quitī ún, te nagā ni cuu níñī maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espíritu jeē iyó ní cání. Te níñī yā nácate ánuá yō nuū jníñu néé jéē cúu yō sáha. Te súcuan te cuu cuajníñu yó núu Yaā Dios, Yaā técu.

¹⁵ Jeē yúcuan cúu jeē ndíso jníñu ya siquī iin contrato jeé. Chi ni jihī yā, te súcuan ni quende yā cuēchi ni casáha ñayuu ná ni iyo i chíji contrato xihna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ní cání, nájnūhun ni jejnūhun ya. ¹⁶ Chi cúu nájnūhun núu sáha iin tēe acta jeē cahán siquī tahū, te nde na cúu de te níhín jníñu. ¹⁷ Chi núu técu gā tēe ni sáha, te tu níhín jníñu. Te nde núu ni jihī de, te sáá te jéjníñu. ¹⁸ Te suni súcuan contrato xihna ñúhún, suni ni jini ñúhún cucutú jíin níñī quitī ní jíhī. Te contrato jeé chi ni cucutú jíin níñī Cristo jeē ni jíhī yā. ¹⁹ Chi ná ni cuu ni cachi Moisés tācá jniñu ndácu contrato ley un núu ndivii ñayuu, te ni quihin de níñī becerro jíin níñī ndixúhú jíin ndute, te jíin ixi cácuéhé jíin yúcū hisopo ni cosō yuyú de siquī libro ley jíin síquī ndivii ñayuu. ²⁰ Te ni cahān de: Yāha cúu níñī jeē cúcutú contrato ley jeē ní sáha Yaā Dios jíin yó, achí de. ²¹ Te suni níñī un ní cosō yuyú de nde maá vehe ií jíin

tāca ndajniñu ni cajejniñu de jeē cáchiñúhún de ya. ²² Te je yajni ndihi ndajniñu, chi cáhán ley un jeē jíní ñúhún ndundoo jíin níñi. Te núu ma cáti níñi te ma cóne cáhnu ni yā nuū cuēchi núú.

Jeē ni sócō Cristo maá yá jeē quēnde yā cuēchi

²³ Núu súcuan te tācá ndajniñu un jēē cácuu muestra tāca jēē iyó andiví, ni jini ñúhún ndundoo jíin níñi quití. Te tāca maá jēē iyó andiví, chi ni jini ñúhún ndundoo jíin níñi Cristo jeē yóhyo vāha ga. ²⁴ Te Cristo chi tu ní quívi ya ini lugar iñ jeē ní casáha ñayuu, chi ñn muestra-ni ni cuu un jēē steén ndese iyó lugar iñ ndije nde andiví. Chi maá andiví ní quívi ya, te vijna íne ya nuū Yaā Dios jeē cahán yā jehē yō. ²⁵ Te maá sūtū cujéhnu ga quívi de tāca cuiyā ini cuarto iñ gā jeē socó de níñi quití. Te Cristo tu ní sócō yā maá yá cuehē jínu, chi ñn jínu-ni. ²⁶ Chi núu jeē súcuan te cánuú jēē cuehē jínu ndoho ya nde ná ni jecōo ñayiví te nde vijna núú. Te tuú chi sa tiempo cuándihi yāhá ni quenda ndijin yā ñn jínu-ni jeē ní cáni, ni socō yā maá yá jeē ní quēnde yā cuēchi. ²⁷ Te nájnūhun ni cundaā jeē cúu tāca ñáyuu ñn jínu-ni, yūcuán na te sándaā Yaā Dios jniñu i, ²⁸ suni súcuan Cristo ni jihí yā ñn jínu-ni jeē ni sócō yā maá yá jeē ní quēnde yā cuēchi cuehē ñayuu. Yūcuán na te ndiji ya inga jínu, te nasūu jēē socó tucu ya maá yá jeē quēnde yā cuēchi, chi sa suhva jeē jnáma ya ñayuu jeē cándetu i jeē ndíji ya.

10

¹ Chi ley Moisés ni cuu ñn muestra-ni tāca jēē váha jeē ní quiji jíin Cristo, ñn jeē steén-ni ndese coo maá jēē váha. Jeē yúcuan tu cúu cuiñi sáha ley un jēē quéndōo ndaā ñayuu jeē quíjicoo i nuū Yaā Dios jeē cásocō i quití nuū cuiyá nuū cuiyá. ² Chi núu ní cúu sáha ley un jēē quéndōo ndaā i, te jecuiñi jeē cásocō i quití núú. Chi núu ní cúu, te

ɨn jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núú. ³ Te tuú chi jeē cásocō i quití ún táca cuíyā, sa sáha jeē núcūhun ni i cuēchi i. ⁴ Chi niñī stíquī jín nñī ndixúhú, ma cúu cuítí quende cuēchi.

⁵ Jeē yúcuan ná ni quiji Cristo ini ñayiví, te ni cahān yā jín Yaā Dios:

Jeē jéhni i quití jín jéé jéhe i ofrenda nuū ní, chi tu ní núnjahan ni ní.

Te ni sátūhva ní yiqui cúñu maá ná jeē socó na.

⁶ Te tu ní cúsiñ ni ni jéé jéhmú i quití te sócō i tí jeē ndúndoo cuēchi i núú.

⁷ Yūcuán na te ni cahān ná: Yāha véji ná jéé squícu ná jniñu jeē núnjahan ni ní, Tátā Yaā Dios.

Chi súcuan je yósó jnúhun na núú tútu.

Achí Jesús. ⁸ Xihna gā ni cahān yā jeē tu ní núnjahan ni Yaā Dios te tu ní cúsiñ ni yā jeē jéhni i quití te jéhe i ofrenda, jín jéé jéhmú i tí te sócō i tí jeē ndúndoo cuēchi i núú, nájñūhun ndácu ley jenahán jniñu. ⁹ Te ni cahān gā yā: Yāha véji ná jéé squícu ná jniñu jeē núnjahan ni ní, Tátā Yaā Dios. Te jeē ni cáhān yā súcuan, te ni sáha ya jeē jécuiñī jeē cásocō i quití, chi ni socō yā maá yá. ¹⁰ Te ni sáha Yaā Dios jeē iyó ndoo íyó íi yō nuū yā siquí jeē ni sáha Jesucristo jeē núnjahan ni Yaā Dios, suu jeē ni sócō yā yiqui cúñu yā ɨn jínu-ni jeē ní cání.

¹¹ Te tāca sūtū ún ndiquiví ni cahiin de ni cajejniñu de nuū yā, te cuehē jínu cájehni de suu quití jeē socó socó de. Te tācá un chi ma cúu cuítí quende cuēchi. ¹² Te Cristo chi ɨn jínu-ni jeē ní cání ni socō yā maá yá jeē siquí cuéchi yó. Te sáa te ni cucōo ya lado váha Yaā Dios nuū cujéhnú ya. ¹³ Te yúcuan ndétu ya vijna nde quiji quiví jeē quénde yā poder tāca jéé jíto uhū nuū yā. ¹⁴ Chi jeē ni sócō yā maá yá ɨn jínu-ni, te ni sáha ya jeē ní cání quendōo ndaā ñayuu

ni sándoo ya. ¹⁵ Te máá Espíritu Santo suni cájí cáhán yā siquī jnúhun yáha, chi xīhna gā cahán yā:

¹⁶ Suhva coo contrato jeē nasáha ri jíin i, nde na quíji quivī yúcuan, áchí Jítóho yō Yaā Dios: Sáha ri jeē jécūhun ley rī ini anuá i, te suni nuū jeē níjnūnī i tee ri jnúhun ley rī.

¹⁷ Yūcuán na te cáhán gā yā:

Ma núcūhun cuiṭi gā ni rī tāca cuéchi jíin jniñu néé ní casáha i.

Achí yá. ¹⁸ Núu súcuan te núu je ni ine cáhnu ni yā nuū cuéchi yó, te tuá cánuú jéē socó gā yō jeē siquí cuéchi yó.

Jeē ní nune ichi quívi yó núu Yaā Dios

¹⁹ Jeē yúcuan hermano, ma ĩn jeē cáni ni yō, chi cuu quivī yó lugar ĩ ndasí ndé nuū iyó Yaā Dios, siquī jeē ní jeti niñī Jesucristo. ²⁰ Chi ni nune ya ĩn ichi jéé jéé cótecu yō ní cáni sáha ya. Chi ná ni jihī yā te ni tahndē sahma ndíta caa jeē ndihyú lugar ĩ ndasí gá ini vehe ĩ. Te súcuan ni steén Yaā Dios jeē núne quívi yó lugar ĩ ndasí gá nuū iyó yá. ²¹ Te Jesús cúu sutū kujéhnū ndasí jeē ndíto yóhó ñáyuu cácuu sēhe Yaā Dios. ²² Núu súcuan te na quívicoo yó núu Yaā Dios, te na cóo ndije ndaā anuá yō, te na cándíje nihin yó jéé iyó ndaā ndihī jnúhun ya. Chi jíin níñī Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núu yā jeē ní jendute yó jíin ndute. ²³ Te na cuiñi nihin yó jíin jnúhun jeē cácahán yō jeē ñúhun ni yō jeē sáha ya jeē váha jíin yó. Te ma cáca yátá yó, chi váha squícu máá Yaā Dios jeē ni jéjnūhun ya nuū yō. ²⁴ Te na nácani ni yō ndese stíhví jnáhan ni yō jeē cundáhú gá ni yō jnáhan yó, jíin jéé sáha yó jniñu váha. ²⁵ Te níni na ndútútú yó chiñúhún yó yā, te ma cúhuun ni yō nájnūhun casáha sava i, chi sa víhyá gā na stíhví jnáhan ni yō, chi je cájini yō jeē cuácuyajni quivī ndíji ya.

²⁶ Te núu je ni jecūhun ni yō te ni jetáhú yó jnūhun ndaā, te núu máni sáha sáha-ni yó cuéchi, núu súcuan te tuá na inga iyó jéē cúū siquī cuéchi yó. ²⁷ Chi sa quéndōo máni ga jnūhun xeēn siquī yō jeē quiji quivī juicio te quiji yáñuhūn xeēn jeē cayū ñayuu jeē cájito uhū i ya. ²⁸ Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jnūhun cúndáhú ni iyó. ²⁹ Te nagā ni cuu jeē ma ndóho xeēn gā ñayuu jeē squéhichī i máá Séhe Yaā Dios, chi nájñuhun jeē jeñú nihnu i siquī yā. Te sáha i jeē tu ndé jéjñiñu niñī yā jeē ní jeti siquī contrato jeē ndúndoo i nuū yā nuú. Te súcuan sáha ndevāha i nuū maá Espíritu Yaā Dios jeē sáha jeē váha yóhó. ³⁰ Chi je jíní yō jeē ni cáhān maá yá: Máá rí sáha jeē ndutahū i siquī cuéchi i, máá rí cuāha castigo i, áchí Jítóho yō. Te suni cáhān: Máá Jítóho yō sándaā yā siquī cuéchi ñayuu yā. ³¹ Núu súcuan te xeēn ndasí cúu jeē quívi ñayuu ini ndaha Yaā Dios, Yaā técu, jeē ndútahū i siquī cuéchi i.

³² Te na núcūhun ni rō ndese ni cuu ichi yátá, nde náa sá ní quejéé ró caca ró jín luz yā, te ni cajendeyí ni rō ni candoho ró tijni jnūndóho xeēn. ³³ Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jnúhun cuiñi ró jín ñáyuu ni candoho súcuan. ³⁴ Chi ni cacundáhú ni rō ñayuu ní cahīn vecāa jeē siquī yā, te ni cacusiñ ni rō vēsú ni caquende ñayuu ndajniñu ró. Chi ni casáha ró cuenta jeē ndé andiví cánevāha ró iñn tahū jeē váha ndasí gá jeē coo ní cání. ³⁵ Núu súcuan te ma siaá rō jnūhun jeē ní candíje ndije ró jéē váha ni yā, chi cuehē ndasí táhū nihīn rō siquī ún. ³⁶ Chi cánúú jéē cuándeyí ni rō návāha sáha ró jéē nújnahan ni Yaā Dios, te nihīn rō jeē ni jéjñuhun ya. ³⁷ Chi cáhān tutu i:

ñn núnúu-ni te ndee Yaā ndiji, te ma cucuéé yá.

³⁸ Te ñayuu jeē ní ndahva rī cuēchi i, cotecu i jeē candíje i jeē sáha ri jehē i.

Te núu na cáca yátá i, te ma cúsih̄ ni rī jíin i.

Achí Yaā Dios. ³⁹ Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cáccandíje yó jéē nihín tahū yō cotecu anuá yō.

Siquī jnūhun cándíje

11

¹ Te jeē candíje yó, suu cúu jeē cúndaā ndije ni yō jeē nihín yō tāca jéē ñūhun ni yō, jíin jéē jiní vāha yó jéē iyó ndije tāca jéē tu cájito yó núu vijna. ² Te ñayuu jenahán chi ni jejnúhún yá i siquī jeē súcuan ni cacandíje nihin i.

³ Siquī jeē candíje yó cúu jeē jécūhun ni yō jeē ni sáha Yaā Dios ñayīvi jíin jnūhun ni cahān-ni ya. Te jíin poder Yaā Dios jeē tu jíto yó núu, ni jecōo tāca jéē jíto yó núu.

⁴ Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vēsú Caín. Te jeē yúcuan ní jejnúhún yá jeē iyó ndáa de, chi ni jetáhú yá jeē ni sócō de quití nuū yā. Te vēsú ni jihī de, te cáhán gā ejemplo de jíin yó nde vijna, chi ni candíje ndaā de.

⁵ Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jíhí de. Te tu ní cánanihīn ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusih̄ ni yā jíin táca jéē ni sáha de. ⁶ Te núu tu cándíje yó jéē sáha ya jehē yō, te tú na modo cusih̄ ni Yaā Dios jíin yó. Chi ñayuu jeē cuní quīvicoo ndaha ya, cánuú jéē candíje ndaā i jeē iyó yá jíin jéē cuáha ya tahū nuū ñayuu jeē nducú i candíje i ya.

⁷ Te Noé ni candíje de jeē sáha Yaā Dios jehē de, ná ni castūhun yá nuū de jeē coo jnūndóho jeē ná tu coto de jeē coo. Te jeē yúcuan ní jendetū de ni sáha de barco

cáhn̄u jeē naní arca, návāha cācu de jíin n̄í vehe de. Te jeē súcuan ni candíje de, te ni cane cuēchi siquī ñayuu jeē tu ní cándíje i ya. Te ni ndahva yā cuēchi de siquī jeē ní candíje de jeē sáha ya jehē de.

⁸ Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jíin de jeē quihín de ñin lugar nuū cuáha ya cuu tahū de. Te ni quenda de cuahān de, vēsú tu jíin de ndé nuū quihín de. ⁹ Ni candíje de jeē sáha ya jehē de, te jeē yúcuan ní condee tatú de nuū ñūhun jeē ni jéjnūhun ya jeē cuáha ya nuū de. Te ni condee de vehe ñi, te suni súcuan Isaac jíin Jacob, chi sēhe de ún suni inuú níh̄in tahū i jíin de jeē ni jéjnūhun ya. ¹⁰ Chi ni ñūhun ni de condee de máá ñuu andiví jéé iyó cutú cimientu, te máá Yaā Dios ni jequin yā ni sama ya ñuu ún.

¹¹ Te suni ni candíje máá Sara jeē sáha ya jehē ña, te jeē yúcuan ní nih̄in ña fuerza jeē ní jecūhun sēhe ña. Chi nde ná ni yāha ndasí cuiyā ña, te ni cacu ñin sēhe yí ña, chi ni candíje ña jeē squícu Yaā Dios jeē ni jéjnūhun ya. ¹² Te súcuan ni cuu jeē ni táhū cuehē ñayuu ni sáha ñin-ni Abraham, vēsú je jéhn̄u ndasí de. Te yucūn de ni nducuehē ndasí, nájñūhun quīmi andiví, jíin ñíti yumar, jeē ma cúu cuiti cahu yó.

¹³ Te tāca tée cándíje un, ní cajih̄i de. Te vēsú tu ní cájito de jeē ni jéjnūhun ya, te ni cajini vāha de jeē cóo, te ni cacusiñ̄i ni de jeē cóto de ñnga tiempo. Te súcuan ni cacahān de jeē ñáyuu ñuu jicá ñáyuu tatú cácuu de ini ñayiví yáha. ¹⁴ Te tāca tée jeē cahán súcuan, chi stéén cají de jeē nducú de ñin ñuu jeē cúu andiví núu cúu ñuu máa de. ¹⁵ Chi núu jeē cánacani ni de siquī ñūu nuū ní quendacoo de, te iyó modo jeē nándicó cóo de te núu jeē cácuu de núu. ¹⁶ Te tuú chi ni cacuu ndasí ni de coyūcú de ñnga ñuu váha ga jeē cúu ñuu andiví. Jeē yúcuan tu cúcanu Yaā Dios

jeē naní yá Yaā Dios de jíjnáhan de, chi je ni sátūhva ya ññ nuu nuū cóyūcú de.

¹⁷ Ni candíje Abraham jeē sáha ya jehē de, te jeē yúcuan ní jehēn de jíín Isaac jeē socó de i, ná ni jito ndee ya de. Te ni ñyo tūhva de jeē socó de sēhe de un jéē mañúhún ni i nuū de, vēsú ni nihīn de jnūhun jeē ni jéjnūhun ya suhva siquī i: ¹⁸ Isaac cúu tēe jeē squejéé rí yucūn rō quihīn, achí jnūhun ni jejnūhun ya. ¹⁹ Te ni sáha de cuenta jeē cúu nastécu Yaā Dios i. Te nájnūhun súcuan ni cuu, chi cuu cahān yō jeē nájnūhun ni jihī i te ni natecu i nuū de, chi ni jesi-ni ya jeē ma cáhni de i.

²⁰ Ni candíje Isaac jeē sáha ya jehē de, te jeē yúcuan ní cahān de jeē vāha tahū nihīn sēhe de Jacob jíín Esaú tiempo quiji. ²¹ Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndíndúú sēhe yí José. Te yítuu de vara de, ni chiñúhún de Yaā Dios. ²² Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yúcūn Israel, ññ quivī quendacoo i nación Egipto. Te ni ndacu de jniñu jeē chíndūji i yiqui de ñnuu nuū quívicoo i.

²³ Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuan ní cacondito sáhi de i uní yoō. Chi ni cajito de jeē lúu cáa i, te tu ní cáyūhú de siquī acta jeē ni sáha rey jeē na cúu tāca súchi yí. ²⁴ Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhí rey Egipto. ²⁵ Chi sa ni cuu ni de ndoho de jíín táca jnáhan de ñayuu Yaā Dios, nasūu jéē cusī ni de jecu-ni tiempo jíín cuéchi. ²⁶ Chi ni sáha de cuenta jeē núu cahān neé ñayuu siquī de jeē siquí Cristo, te yúcuan sáha jeē cucá ndasí gá de ndíhi jeē ndíso jnūhun Yaā Dios, vēsú jeē nihín de ndíhi ndajníñu cúcá íyó nación Egipto. Chi ni ñuhun ni

de jeē cuáha ya tahū de. ²⁷ Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni ĩn nĩhin de siquĩ jniñu sáha de, chi ni sáha de cuenta jeē je jíto de nuū Yaā jeē tu cúu coto yó núū vijna.

²⁸ Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñĩ tĩ yehyí i, návāha núu na quĩji ndajéhe jeē cáhni yā tāca séhe nuú ñáyuu Egipto, te ma cáhni yā sēhe nuú ñáyuu Israel. ²⁹ Te siquĩ jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núú, te ni nandihyū-ni ndute siquĩ de ni cajihĩ de.

³⁰ Ni cacandíje soldado jeē sáha ya jehē de, te jeē yúcuan ní cotúu jeē ní condúu ndihyú ñuu Jericó, ná ni cajicó ndúu de uxā quivĩ. ³¹ Te Rahab, vésú ñahan tĩjni ni ni cuu ña, te ni candíje ña jeē sáha ya jehē ña. Te ni chindéé ñáhán ña tēe Israel jeē ní quijicoo ni condēhé yuhu ndese íyó ñuu ña. Te jeē yúcuan tu ní jíhĩ ña jíin ñáyuu nĩhni ni ñuu ña ún.

³² ¿Te ndé jnúhun ga cahān rĩ núu súcuan? Chi tuá na tiempo jeē nácani ga rĩ jnúhun Gedeón jíin Barac jíin Sansón jíin Jefté jíin David jíin Samuel jíin táca tée ni canacani jnúhun ya nde jenahán. ³³ Ni cacandíje de jeē sáha ya jehē de jíjnáhan de, te jeē yúcuan ní cacundeyí de ni canajniĩ de táca ñuu náhnu, te vāha ni candacu de jniñu nuū, te ni chindéé ñáhán yá de nájnūhun ni jejnūhun ya. Te nuū sava de ni jesi Yaā Dios yuhu ndícaha jeē tu ní cáyeji tĩ de. ³⁴ Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhĩ de jíin espada. Te sava de ni nanihĩn ni de náa tuá fuerza de núú, te ndacuí teyí ní ĩyo de nuū guerra, te ni cacundeyí de siquĩ soldado

tācá ñuu jicá jéē jító uhū ún de. ³⁵ Te sava ñahan ni natecu sēhe ña jeē ni jíhī i.

Te sava ga ñayuu chi sa suhva ni candoho xeēn i nde ni cajihī i. Te tu ní cājēhe i jnūhun jeē siaá i jnūhun ya te cācu i, chi ni catee ni i jeē natecu i coyūcu váha ga i andiví. ³⁶ Te sava ga i ni casácatā ñayuu nuū i, te ni cacani ñayuu i, te nde ni caconuhnī cadena i ni cahīin i vecāa. ³⁷ Te ni cajēhe yuū xinī i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuán, te máá ññ lánchi máá ññ ndíxuhú ní cañuhun i. Ni candoho ndáhú i, ni cajito i jnúndóho, ni castóho ñayuu i. ³⁸ Vāha ndasí ñáyuu ni cacuu i jeē tú cuiti ñayuu ñayīvi súcuan, te vēsú súcuan te ni casáha ñayuu jeē ní cajica cuu i nuū ñūhun téhé jíin chíji yucu, ni cahīin i yaū cava jíin yáū ñuhun. ³⁹ Te tāca ñáyuu yáha, vēsú ni jejnúhún yá i jeē ní cacandíje ñihin i jeē sáha ya jehē i, te tu ní cājito i nuū jeē ni jéjnūhun ya. ⁴⁰ Chi ni sátūhva Yaā Dios ññ jniñu váha ga, te suu cúu jeē sáha Cristo jíin yó, návāha ññ cáhnu-ni nihīn yō tahū yō jíin i, te jeē yúcuan cúu jeē ná tu nihīn i ndíhi tahū i.

Jeē na cócunuū yō nuū maá ññ-ni Jesús

12

¹ Te íyó cuéhē ndasí ñáyuu un jéē ní cacandíje ñihin i jeē sáha ya jehē i, te nájñuhun ni jicó ndūū i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máá yó, na téjiyo yó táca jéē sajnēnu jíin cuéchi jeē ni cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó. ² Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jnúhun ya nde jīnu ije yó. Chi máá yá ni jendeyí ni yā ni ndoho ya jicā cruz. Te vēsú jnūhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa

cusih ndasí ni yā ná ni cuu ni ndoho ya. Yūcuán na te ni cucōo ya lado váha mesa nuū ndácu Yaā Dios jniñu.

³ Te na nácani ni rō ndese ni jendeyí ni yā ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho. ⁴ Chi ni ná tu ndoho ró jeē ndé cuu rō jeē cánducú ndéyí ró snāā rō cuéchi. ⁵ Te sanaa te je ni canaa ni rō jnūhun cáhán tutu iī, jeē stihví ni Yaā Dios rohó jéē cácuu ró séhe ya:

Séhē, ma quití ni rō jeē snahnú Jitoho yō rohó, te ni ma ndínuu ni rō núu cáhán yā nuū rō.

⁶ Chi Jitoho yō snáhnú yā ñayuu jeē maní yā jíin, te jéhe ya castigo tāca jéē náquihin ya cuu sēhe ya.

Achí tutu. ⁷ Núu súcuan te na cuándeyí ni rō jeē snahnú Yaā Dios rohó, chi sáha ya jíin ró nájñūhun sáha tátá jíin séhe. Chi tú na sēhe iyó jéē tu snáhnú tátá i. ⁸ Te núu ma snahnú yā rohó, nájñūhun ndóho tāca séhe, núu súcuan te nájñūhun sēhe ndáhú cácuu ró, nasūu séhe ndije ya.

⁹ Te tátá yō ñayīvi yáha, suni ni snahnú de yóhó, te ni iyo yíñúhún yó jíin de. Te nagā ni cuu jeē ma cuándetū yō nuū maá Tátá yō andíví jeē snahnú yā yohó, te cotecu yō níf cáni. ¹⁰ Te ndaā chi máá de ni casnáhnú de yóhó jecu-ni quiví, ndese ni cuu ni maá de. Te máá yá chi snáhnú yā yohó iin modo jeē quéndōo vāha ga yō, návāha coo ndoo yó nájñūhun iyó ndoo máá yá. ¹¹ Te ndaā chi tu cácusih ni yō maá hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ní quéndōo ndaā yō te coo ndeyí sīh ni yō jeē ni snáhnú yā yohó.

Siquī ñáyuu jeē casquéhichī i jnūhun cáhán Yaā Dios

¹² Núu súcuan te ma cóo ró nájñūhun tēe ni cuíta íi ndaha te quísi i xinī yití, chi sa ndacuī na sáha ró máá ró nuū jnúndóho. ¹³ Te sáha ró ichi ndóó caca ndaā

rō, návāha nduvāha rōhó jēē tu fuerza ini, jeē cácuu ró nájñūhun tē chácuá jeē tu cúu caca vāha.

¹⁴ Te na cóndihvī ni rō jeē condee manī rō jíin táca ñáyuu, jíin jēē cóo ndoo coo īi rō nuū yā. Chi ma cúu coto ni ñin ñayuu nuū maá Jítóho yō te núu tu íyó ndoo i. ¹⁵ Te coto má cáca yátá ni ñin ró te scuíta ró jñūhun jeē sáha Yaā Dios jeē váha rōhó, návāha tú cuu ró nájñūhun ñin yucū uvuá jeē stívi te sáha daño jíin cuéhē ñayuu. ¹⁶ Te ni ñin ró ma cáca jnéni. Te ni ma cóo jēē ni rō nuū Yaā Dios, nájñūhun ni īyo Esaú. Chi máá ñin cohō ndeyu ni jicān de nuū ñáni de, ni sama de jíin derecho de jeē cúu de sūchi núú, te súcuan ni xícó de derecho de. ¹⁷ Te cájini rō jeē cucuéé gá te ni cuni de jeē na cáhán tatá de jeē váha tahū nihīn de, te tu ní cúu, chi tuá ni táñúhún Yaā Dios de. Chi tu ní níhīn jñíñu jeē ní nacani ni de, vēsú ni nducú ndéyí de te nde ndahyú de.

¹⁸ Te rōhó jíjnáhan ró tu ní quíjicoo ró núu íyo cúu, nájñūhun īyo ni cuu máá yucu nuū ni jéhe ya ley yā nuū ñáyuu Israel. Chi ni cane yáñuhūn yucu Sinaí, te nee lúchi jnúú jíto, te quée tachī xeén. ¹⁹ Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jíin i. ²⁰ Chi tu ní cúndeyí i jíin jñūhun jeē ní ndacu ya jniñu nuū i, chi ni cahān yā: Vēsú ñin quíti-ni núu quívi tí yucu yáha, jíni ñúhún cuu tí jíin yúu chí jíin lanza, achí yá. ²¹ Te síquī jeē íyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

²² Te vijna rōhó jēē cá candíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quívicoo ró. Te ñuu un cúu Jerusalén jeē iyó andiví, nuū cáhīyo tútú cuéhē ndasí mil ndajéhe cáchiñúhún Yaā Dios. ²³ Te ni quívicoo ró núu cáyūcu tútú ñáyuu cá candíje jeē cácuu sēhe Yaā Dios, jeē iyó lista i

andiví. Te ni quivicoo ró núu Yaā Dios, Yaā sándaā jniñu ndihí ñayuu, jíin núu cáhīyo ánuá ñayuu vāha jeē jé ni squéndōo ndaā yā i. ²⁴ Te suni nuū maá Jesús, Yaā ndíso jniñu siquī contrato jeé ní quivicoo ró. Te yahu ndasí gá jniñu sáha niñī yā jeē ni jéti jeē ndáhva cuēchi yó, nasūu níñī Abel jeē ni jícan cuēchi.

²⁵ Núu súcuan te coto má squéhichī rō jnūhun jeē cahán yā jíin ró jijnáhan ró. Chi ñayuu jeē tu ní cájetáhú ná ni cahán yā jíin i ñayīvi yáha, tu ní cáccācu i. Te xeēn gā ndoho yóhó te núu ma cuatáhú yó nuū yā jeē cahán yā nde ichi ándiví núu súcuan. ²⁶ Te nde saá ní quisī i ñayīvi jéé ni cáhān yā. Te vijna chi cáhān yā: ĩn na jínu quisī ri ñayīví, te nasūu máa-ni ñayīví, chi suni tāca jéé ĩn andiví, áchí yá. ²⁷ Te jnūhun yáha jéé cahán, ĩn na jínu, chi cúni cahán jeē téjiyo ya tāca jéé tu íyó cutú, suu jeē ní cuvāha, návāha na quéndōo jeē cóo cutú ní cání. ²⁸ Núu súcuan te cuāha Yaā Dios ĩn ñuu nuū yō jeē cóo cutú ní cání. Te jeē yúcuan, na nácuatáhú yó nuū yā, te na chíñúhún yó yā, te na cóo yíñúhún yó, návāha cusī ni yā jíin yó. ²⁹ Chi Yaā Dios maá yó cúu nájnūhun ĩn ñuhūn jeē snāā ndihí jeē neé.

Ndese sáha yó te cusī ni Yaā Dios

13

¹ Ma jécuiñī rō jijnáhan ró jéé cundáhú ni rō hermano rō cáccandíje. ² Conahán ró jeē cánuú cuáha núu ró vehe nuū ñayuu cájica. Chi íyó jínu jeē súcuan ni cajēhe núu ñayuu vehe, te tu ní cájini i jeē nuū maá ndajéhé andiví ní cajēhe núu i vehe.

³ Te conahán ró chindée ñáhán ró ñayuu cáhīin vecāa, chi sáha ró cuenta jeē nájnūhun cáhīin cáhnu ró jíin i vecāa. Te suni nacani ni rō jehē jnáhan ró jéé cándoho i

sáha ñayuu, chi núu súcuan coo jíin máá ró te suni ndoho ró.

⁴ Coo yíñúhún ró síquī jnúhun quíjnáhan ñayuu, te ma cosíquí ndéē jnáhan ró. Chi máá Yaā Dios sándaā yā cuēchi ñayuu tijni ni jíin ñáyuu casíquí ndéē jnáhan.

⁵ Te ma ndíyo ni rō xūhún, chi na cóo sīñ ni rō jíin jēē cánevāha ró. Chi máá yá ni cahān: Ma siaá cuíti rī rohó, ni ma stóo cuíti rī rohó, áchí yá. ⁶ Núu súcuan te ma ĩñ jeē cáni ni yō, chi cuu cahān yō:

Máá Jítóho rī chíndéē ñáhán yá ruhū,
te ma yūhu rí núu na vé cuní ñayuu sáha i jíin rí.
Achi yō.

⁷ Te na núcūhun ni rō tācá pastor rō, jeē ní castéén de jnūhun Yaā Dios nuū rō. Te sáha vāha ro cuenta ndese ni nihīn jníñu jeē ní casáha de, te na ndácu ró de jeē ní cacandíje de jeē sáha ya jehē de.

⁸ Te Jesucristo chi ĩñ-ni cáa ya ichi yátá jíin vijna jíin ní cáni. ⁹ Núu súcuan te ma cuáha ró jnúhun candíje ró táca jnúhun jeē sīñ cáhán jeē tu quíjnáhan jíin jnúhun máá yá. Chi íyó váha jeē na íje ánuá yō sáha jnūhun jeē váha ni yā jíin yó. Te tu jíni ñúhún yó jnūhun jeē tajnúní síquī jeē yéji yō, chi tu níhín jníñu cuíti jíin ñáyuu cáhīn jíin.

¹⁰ Te máá yó chi cánevāha yó ĩñ jeē ni sócō maá jéhē yō, cúu Cristo. Te tāca sūtū jeē cásocō gā de modo jeē cahán ley jenahán, tú na vé nihín de nuū yā jeē ni sócō yā maá yá. ¹¹ Te sutū kujéhnu ga, ná ni socō de niñī tācá quitī ini cuarto ĩi gā jeē síquí cuéchi, te yíqui cúñu tī ni cajehmu de ichi yátá ñuu. ¹² Te suni súcuan ni ndoho máá Jesús ichi yátá ñuu, návāha jíin níñī maá yá te sándoo ya ñayuu. ¹³ Núu súcuan te ma cóo ĩnuú gá ni yō jíin ñáyuu tu cácanđije, chi nájnūhun quihīn yō jíin yá ichi yátá ñuu, te na ndóho yó jíin yá jeē sácatā i. ¹⁴ Chi ñayīvi yáha tu íyó ñuu nuū coo yó ní cáni, chi sa cánducú yó máá ñuu nuū

cóyūcu yó quivī quíji. ¹⁵ Núu súcuan te jeē jíin Jesucristo te níní na cáhán yō jeē yóhoyo cújéhnū Yaā Dios, chi suu cúu nájnūhun ñin jeē socó yō nuū yā, suu jeē nácuatáhu yó nuū yā. ¹⁶ Te ma náā ni rō sáha vāha ró núū jnāhan ró, te cuāha ró jéē cúmanī nuū i. Chi nájnūhun ñin jeē cásocō rō nuū Yaā Dios cúu tāca jéē yáha, te cúsiñ ni yā jíin.

¹⁷ Te cuandije ró núū tēe cácuu pastor rō, te cuandetū rō nuū de. Chi cándito de rōhó jéē quéndōo vāha ánuá rō, chi cájini de jeē cánuú nacuāha de cuenta nuū yā. Te condihvī ni rō sáha vāha ró, návāha cusīñ ni de siquī rō te ma cucuíhyá ni de siquī rō. Chi núu tu súcuan te ma cóo jeē vāha jíin ró.

¹⁸ Te cacān tahu rō jehē rī jijnáhan ri. Chi vāha íyó ni anuá rī jeē tú na cuēchi ri. Chi cācuni rī caca yíñúhún rí jíin táca jniñu. ¹⁹ Te suni cáhán ndahú rí jíin ró jeē cacán tahu ndasí ró jehē maá rí, návāha cuāha ya jnūhun jeē yachī gā cuajeē tucu ri nuū rō.

Bendición jíin saludo jeē sándīhí

²⁰ Te máá Yaā jeē jéhe jnūhun ndeyí sñ ni nuū yō, ni nastécu yā Jitoho yō Jesucristo mēhñu ndíyi. Te Jesús cúu pastor cújéhnū jeē ndíto ñayuu cácuu nájnūhun lanchi ya. Chi jíin níñī yā ni sácutú yá contrato jeé yá jeē coo ní cāni. ²¹ Te ñúhun ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu vāha ndese nújnahan ni yā. Te ñúhun ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsiñ ni yā jíin. Te na cáhán yō jeē yóhoyo luu cújéhnū ya ní cāni. Amén.

²² Hermano jijnáhan ró, cáhán ndahú rí jíin ró jeē cone cáhnu ni rō jeē stīhvī ni rī rohó jíin jecu-ni jnūhun ni tee ri nuū carta yáha. ²³ Te cástūhun rí jeē hermano yō Timoteo, je ni quenda de vecāa. Te núu yachī quiji de yāhá, te cuajecoo ndindúú rí nuū rō coto jnāhan yó.

²⁴ Te cahān rō jín táca tée cácuu pastor rō jín táca hermano cácanđije jeē sánđeyí ni de, áchí rí. Te ñayuu Italia suni cácahān i jeē sánđeyí ni rō.

²⁵ Te ñúhun ni rī jeē na sáha ga Yaā Dios jeē váha róhó jíjnáhan ró. Súcuan na cóo. Amén.

Nuevo Testamento en mixteco

New Testament in Mixtec, Atatláhuca (MX:mib:Mixtec, Atatláhuca)
copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
